



Republika e Kosovës
Republika Kosovo-Republic of Kosovo
Kuvendi - Skupština - Assembly

Legjislatura V
Sesioni vjeshtor

Seanca plenare e Kuvendit
P-074
Prishtinë, më 29 shtator 2016

PROCESVERBAL

**I SEANCËS PLENARE TË KUVENDIT TË REPUBLIKËS SË KOSOVËS,
E MBAJTUR MË 29 SHTATOR 2016**

Seancën e drejtoi Kadri Veseli, kryetar i Kuvendit, ndërsa i ndihmoi Sabri Hamiti, nënkryetar i Kuvendit.

Kryetari, në fillim të seancës, për të përkujtuar 25-vjetorin e mbajtjes së Referendumit për pavarësinë e Republikës së Kosovës, fjalën ia dha nënkryetarit të Kuvendit, Sabri Hamiti.

Nënkryetari i Kuvendit, Sabri Hamiti, tha se sot në Kuvend dhe në gjithë vendin kujtojmë 25-vjetorin e një ngjarjeje të shënuar për Republikën tonë - Referendumin për pavarësinë e Kosovës që u mbajt nga 26-30 shtator të vitit 1991. Organizuar në Kosovë, në republikat ish-jugosllave, në Evropë, në Amerikë, në Australi dhe gjetiu, nga 99,87% e qytetarëve të Kosovës që dolën ato ditë në referendum, 81,01% e trupit votues votuan “për”. Me shumicë absolute, gati një milion njerëz e pohuan vullnetin për sovranitet të Kosovës.

Rezultatet e Referendumit u formalizuan më pastaj me Rezolutë të Kuvendit të Kosovës.

Referendumi për pavarësi vërtetoi dhe legjitimoi Deklaratën e Pavarësisë të 2 Korrikut 1990 dhe shpalljen e Kushtetutës së Republikës së Kosovës të 7 shtatorit të po këtij viti. Referendumi u parapriu zgjedhjeve të para demokratike parlamentare e presidenciale në vend, më 24 maj 1992.

Këto ishin themelet juridike e demokratike të shtetit të Kosovës, që do të bëhej me rrugë institucionale politike, më vonë edhe ushtarake, për liri e pavarësi të vendit.

Fjala e plotë e nënkryetarit është dhënë në transkript.

Në vazhdim, Kuvendi i zhvilloi punimet e seancës plenare sipas rendit të ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

1. Koha për deklarime jashtë rendit të ditës

Deklarime jashtë rendit të ditës paraqitën këta deputetë: Labinotë Demi-Murtezi, Nuredin Ibishi, Glauk Konjufca, Teuta Haxhiu, Shukrije Bytyçi, Flora Brovina, Driton Çausi dhe Shaip Muja, diskutimet e të cilëve janë dhënë të plota në transkript.

2. Koha për pyetje parlamentare

Deputeti Raif Qela i parashtoi pyetje kryeministrit të Kosovës, Isa Mustafa, në lidhje me procedimin e Projektligjit për “Trepçën”.

Kryeministri i Kosovës, Isa Mustafa, iu përgjigj deputetit Raif Qela.

Deputeti Salih Salihu i parashtoi pyetje kryeministrit të Kosovës, Isa Mustafa, në lidhje me situatën e banorëve të Hades dhe fshatrave përreth, sa i përket sigurisë së jetës në këto vendbanime.

Kryeministri i Kosovës, Isa Mustafa, iu përgjigj deputetit Salih Salihu.

Deputetja Besa Baftija i parashtoi pyetje ministrit të Shëndetësisë, Imet Rrahmani, në lidhje me mosfunksionimin e aparaturave mjekësore në shëndetësinë sekondare dhe terciare në Republikën e Kosovës.

Ministri Imet Rrahmani iu përgjigj deputetes Besa Baftija.

Deputetja Besa Baftija i parashtoi pyetje ministrit të Shëndetësisë, Imet Rrahmani, lidhur me mosfunksionimin e odave të profesionistëve shëndetësorë.

Ministri Imet Rrahmani iu përgjigj deputetes Besa Baftija.

Deputetja Selvije Halimi i parashtoi pyetje ministrit të Shëndetësisë, Imet Rrahmani, në lidhje me implementimin e Ligjit të sigurimeve shëndetësore.

Ministri Imet Rrahmani iu përgjigj deputetes Selvije Halimi.

Deputeti Mytaher Haskuka i parashtoi pyetje ministrit të Zhvillimit Ekonomik, Blerand Stavileci, në lidhje me aspektin e mbikëqyrjes së Agjencisë Kosovare të Privatizimit në fushën e respektimit të të drejtave të punëtorëve në ndërmarrjet shoqërore.

Ministri Blerand Stavileci nuk ishte i pranishëm në sallë.

Deputetja Albulena Haxhiu i parashtoi pyetje ministres së Drejtësisë, Dhurata Hoxha, në lidhje me veprimet e kësaj ministrie kundër korrupsionit dhe krimit të organizuar.

Ministrja Dhurata Hoxha nuk ishte e pranishme në sallë.

Deputetja Selvije Halimi i parashtoi pyetje ministrit të Infrastrukturës, Lutfi Zharku, në lidhje me veprimet e kësaj ministrie për vendosjen e ujëmbledhësve nëpër rrugë.

Ministri Lutfi Zharku iu përgjigj deputetes Selvije Halimi.

Deputetja Ganimete Musliu i parashtoi pyetje ministrit të Punëve të Brendshme, Skender Hyseni, në lidhje me qarkullimin e automjeteve pa targa dhe me targa të paligjshme në veriun e qytetit të Mitrovicës.

Ministri Skender Hyseni iu përgjigj deputetes Ganimete Musliu.

Deputeti Salih Salihu i parashtoi pyetje ministrit të Bujqësisë dhe Zhvillimit Rural, Memli Krasniqi, lidhur me kompensimin e fermerëve për gjedhet e ngordhura nga sëmundja gungore.

Ministri Memli Krasniqi nuk ishte i pranishëm në sallë.

Deputeti Visar Ymeri i parashtoi pyetje kryeministrit të Kosovës, Isa Mustafa, në lidhje me procedimin e Projektligjit për “Trepçën”.

Kryeministri i Kosovës, Isa Mustafa, iu përgjigj deputetit Visar Ymeri.

Deputeti Zafir Berisha i parashtoi pyetje ministrit të Punëve të Brendshme, Skender Hyseni, në lidhje me mungesën e targave për automjete.

Ministri Skender Hyseni iu përgjigj deputetit Zafir Berisha.

Deputeti Zafir Berisha i parashtoi pyetje ministres së Tregtisë dhe Industrisë, Hykmete Bajrami, në lidhje me matësit e energjisë elektrike.

Ministrja Hykmete Bajrami nuk ishte e pranishme në sallë.

Deputeti Enver Hoti i parashtoi pyetje ministrit të Punëve të Brendshme, Skender Hyseni, në lidhje me gjendjen e sigurisë në zonën kufitare Kosovë - Mali i Zi.

Ministri Skender Hyseni iu përgjigj deputetit Enver Hoti.

Deputeti Ismajl Kurteshi i parashtoi pyetje ministrit të Punës dhe Mirëqenies Sociale, Arban Abrashi, pse pensionistëve kontributdhënës me 14, 13, 12, 11 e 10 vjet përvojë nuk u llogariten për pagesën e pensionit.

Ministri Arban Abrashi iu përgjigj deputetit Ismajl Kurteshi.

Deputeti Fadil Beka i parashtoi pyetje ministrit të Punës dhe Mirëqenies Sociale, Arban Abrashi, lidhur me Komisionin për vlerësimin e shkallës së invaliditetit për pjesëtarët e luftës së UÇK-së.

Ministri Arban Abrashi iu përgjigj deputetit Fadil Beka.

3. Miratimi i procesverbalit nga seanca e mëparshme

Kuvendi e miratoi pa vërejtje procesverbalin e seancës plenare, e mbajtur më 22 shtator 2016.

4. Votimi për emërimin e një anëtari në Komisionin për Kërkesa Pronësore

Kryesuesi i njoftoi deputetët se diskutimet për këtë pikë kanë përfunduar në seancën e kaluar. Por, për mungesë të kuorumit, votimi i kësaj pike është shtyrë.

Kryesuesi e hodhi në votim propozimin për emërimin e anëtarit të Komisionin për Kërkesa Pronësore.

Rezultati i votimit ishte si në vijim:

Për ----- 49,

Kundër ----- 0,

Abstenime ----- 2.

Kryesuesi konstatoi se nuk ka kuorum të nevojshëm për të vendosur për emërimin e anëtarit në Komisionin për Kërkesa Pronësore.

Kryetari i Grupit Parlamentar të LDK-së, Ismet Beqiri, propozoi që pikat e rendit të ditës 5, 8 dhe 9 të shtyhen për një seancë tjetër.

Kryesuesi kërkoi deklarinimin e grupeve parlamentare lidhur me propozimin e lartshënuar.

Pas deklarinimit të kryetarëve të grupeve parlamentare, kryesuesi e hodhi në votim propozimin e z. Ismet Beqiri.

Rezultati i votimit ishte si në vijim:

Për ----- 76,
Kundër ----- 1,
Abstenime ----- 0.

Kryesuesi konstatoi se Kuvendi me shumicë votash vendosi që pikat: 5. Votimi i Projektligjit për investimet strategjike në Republikën e Kosovës, 8. Shqyrtimi i Propozim-vendimit të Qeverisë së Republikës së Kosovës, nr. 05/106, datë 25.08.2016, me të cilin konsiderohet interes publik lëshimi i licencës për projektin e kompanisë Envidity Energy Kosova LLC dhe 9. Shqyrtimi i Propozim-vendimit të Qeverisë së Republikës së Kosovës, nr. 06/106, datë 25.08.2016, me të cilin konstatohet interes publik lëshimi i licencës për hulumtim për projektin e kompanisë Sharr Cem dhe Titan Amerika, të shtyhen për ndonjë seancë tjetër të radhës.

6. Interpelanca e kryeministrit Isa Mustafa, sipas kërkesës së deputetit Visar Ymeri, i mbështetur edhe nga 6 deputetë nënshkrues, lidhur me kodin telefonik shtetëror të Republikës së Kosovës

Kryesuesi i njoftoi deputetët se deputeti Visar Ymeri, i mbështetur edhe nga 6 deputetë nënshkrues, ka parashtruar kërkesë për ta ftuar në interpelancë kryeministrin e Republikës së Kosovës, z. Isa Mustafa, në lidhje me kodin telefonik shtetëror të Republikës së Kosovës.

Ai i njoftoi deputetët për kohëzgjatjen e interpelancës prej tri orësh, si dhe për kohën e ndarë për secilin grup parlamentar dhe për deputetët pa grup parlamentar.

Kryesuesi e ftoi propozuesin e interpelancës që ta marrë fjalën.

Deputeti Visar Ymeri, në emër të grupit të deputetëve nënshkrues, tha se kodi telefonik sipas marrëveshjes së nënshkruar nga kryeministri Isa Mustafa me Vuçiqin, e më herët ish-kryeministri Hashim Thaçi me Daçiqin, i ndahet Serbisë, sepse Kosova nuk po bëhet anëtare e ITU-s, e Serbia ia cakton këtë kod Kosovës.

Duket absurde që pas kaq shumë përpjekjesh edhe vitesh të përpjekjeve për shkëputje nga Serbia dhe pas tetë vjetësh nga shpallja e pavarësisë së vendit tonë Serbia të jetë pronar i kodit telefonik.

Kryeministri i Qeverisë së Republikës së Kosovës, Isa Mustafa, më 25 2015 kishte nënshkruar, mes të tjerash, në Bruksel edhe planin e përbashkët të veprimit për telekomunikacionin mes Republikës së Kosovës dhe Serbisë, me ndërmjetësimin e komisaresh për politikë të jashtme, Frederika Mogherini. Sipas marrëveshjes, Unioni

Ndërkombëtar i Telekomunikacionit, pra ITU, do t'ia alokonte kodin shtetëror +383, ndërsa aplikimin do ta bënte Austria, siç ishte dakorduar në marrëveshje.

Ndërsa, sa i takon dhënies në përdorim të kodit telefonik, pra botimit në buletin e ITU-s, thuhej: "...teksti i buletinit të ITU-s, me pajtimin e administratës së Republikës së Serbisë, drejtori i Telekom-Serbia i cakton Kosovës kodin ndërkombëtar si në vijim..." dhe pastaj tregon për kodet që do të caktohen, aneksi 1 i Marrëveshjes.

Me këtë veprim kryeministri Isa Mustafa pati rënë dakord me kryeministrin e Serbisë që Qeveria e Kosovës, në kundërshtim me ligjin, të urdhërojë Autoritetin Rregullator për Tregun e Telekomunikacionit që të lejonte brenda territorit të Kosovës operimin e një kompanie të re, që do të regjistrohej deri në hapjen e tenderit ndërkombëtar për operatorin e radhës. Operatori që do t'i lejohej përkohësisht të operonte në Kosovë është Telekom i Serbisë.

Ne si lëvizje, por edhe opozita në përgjithësi, menjëherë pas nënshkrimit kemi bërë thirrje për zbrapsje nga kjo marrëveshje. Midis tjerash, këtë marrëveshje e kanë kundërshtuar edhe 205 mijë firmëtarët e peticionit të mbajtur para një viti në Kosovë.

Po ashtu, kemi mbajtur dhjetëra konferenca e tryeza përgjatë viteve 2011 - 2015, me theks të veçantë këtë rrezik për kodin telefonik të Kosovës. Të gjithë specialistët e telekomunikacionit në Kosovë, siç e pamë gjatë tryezës së mbajtur më 27 janar të vitit 2016 në Prishtinë, e kundërshtonin hapur këtë marrëveshje.

Republika e Kosovës ka mundur të aplikojë vetë në ITU, sipas nenit 2, pika c) e Kushtetutës së ITU-s. Po ashtu, Republika e Kosovës ka mundur ta shfrytëzojë kodin +355 të Republikës së Shqipërisë, duke e zbatuar Rezolutën e Kuvendit që ishte nxjerrë më herët për këtë çështje.

Qeveria e Republikës së Kosovës ka vendosur në kundërshtim me vullnetin e Kuvendit.

Diskutimi i plotë i z. Visar Ymeri është dhënë në transkript.

Pastaj, kryesuesi e ftoi kryeministrin e Republikës së Kosovës z. Isa Mustafa, që ta paraqesë qëndrimin e Qeverisë lidhur me këtë çështje.

Kryeministri i Kosovës, z. Isa Mustafa, tha se kodi ndërkombëtar telefonik i Kosovës ka rëndësi të madhe shtetërore, sepse i jep Kosovës sovranitet ndërkombëtar në sektorin e telekomunikacionit dhe përbën një prej simboleve të rëndësishme për vendin dhe për shtetin tonë.

Kosova në Bruksel, në dialog me Serbinë, ka arritur marrëveshjen për telekomunikacionin, e cila i siguron Kosovës kodin telefonik shtetëror. Kosova do ta ketë kodin e vet telefonik shtetëror nga ITU-ja, Unitetit Ndërkombëtar të Telekomunikimeve dhe ky kod do të jetë +383.

Marrëveshja për telekomunikacion e arritur në Bruksel në shtator të vitit 2013 është një marrëveshje ndërkombëtare e nënshkruar nga tri palë: nga Republika e Kosovës, nga ajo e Serbisë dhe nga Bashkimi Evropian. Ndërsa, më 25 gusht të vitit 2015 është nënshkruar plani i veprimit për zbatimin e marrëveshjes për telekomunikacionin nga kryeministrat e dy shteteve dhe nga përfaqësuesja e lartë e Bashkimit Evropian.

Marrëveshja për telekomunikacionin derivon nga marrëveshja e parë e parimeve për normalizimin e marrëdhënieve, e datës 19 prill 2013.

Me këtë marrëveshje Republika e Kosovës ka forcuar sovranitetin shtetëror dhe integritetin e saj territorial dhe ka avancuar pozicionin e saj ndërkombëtar, sidomos në fushën e telekomunikacionit, me faktin se Organizata Ndërkombëtare e Telekomunikacionit do t'ia alokojë Kosovës kodin e saj telefonik ndërkombëtar, e jo Serbia.

Austria tashmë ka aplikuar në janar të këtij viti, në emër të Kosovës, për të kërkuar nga ITU t'ia ndajë kodin telefonik Kosovës. Arsyeja pse është dashur Austria të aplikojë lidhet me faktin se Bashkimi Evropian, pas shqyrtimit të të gjitha mundësive ligjore dhe politike që Kosova ta marrë kodin e saj telefonik nga ITU-ja, ka ardhur në përfundim se në këtë mënyrë mund të largoheshin pengesat, sepse Kosova ende nuk është anëtare e Kombeve të Bashkuara.

Kosova do të ketë të gjitha të drejtat shtetërore që të administrojë kodin e vet telefonik, sikurse të gjitha shtetet e tjera. Autoriteti Rregullator i Kosovës, ARKEP, do të bashkëpunojë me ITU-në për realizimin e kodit telefonik për Kosovë.

Marrëveshja për telekomunikacionin kontribuon në normalizimin e gjendjes në sektorin e telekomunikacionit, sepse shuhet të gjithë operatorët ilegalë të telefonisë mobile e fikse të Serbisë në Kosovë. Do të ofrohet një lejim i përkohshëm për një fushëveprim të kufizuar, për një kompani të re, që është regjistruar në Kosovë dhe e cila do të veprojë sipas ligjeve të Kosovës. Ky nuk do të jetë një operator i tretë mobil në Kosovë. Ky lejim i përkohshëm për këtë kompani do të vlejë deri në hapjen e tenderit ndërkombëtar për operatorin e tretë të telefonisë mobile në Kosovë.

Qeveria e Republikës së Kosovës është angazhuar që në bashkëpunim me Shqipërinë të realizojë Rezolutën e Kuvendit të Kosovës për të marrë kodin e përbashkët me Shqipërinë 355, mirëpo pas angazhimeve të shumta të Qeverisë së Shqipërisë që të arrihet ky qëllim, ITU-ja nuk e ka miratuar një kërkesë të tillë.

Politikat e fqinjësisë dhe të bashkëpunimit rajonal janë pjesë e rëndësishme e politikës së jashtme të Kosovës në kuadër të vizionit tonë euroatlantik për shtetin e Kosovës. Diskutimi i plotë i kryeministrit është dhënë në transkript.

Pastaj, kryesuesi e hapi debatin për interpelancën e kryeministrit Isa Mustafa.

Për këtë pikë të rendit të ditës diskutuan këta deputetë: Besim Beqaj, në emër të GP të PDK-së; Ismet Beqiri, në emër të GP të LDK-së; Glauk Konjufca, në emër të GP të LVV-së; Pal Lekaj, në emër të GP të AAK-së; Enver Hoti, në emër të GP të "Nismës", si dhe deputetët: Faton Topalli, Bali Muharremaj, Shukri Buja, Haxhi Shala, Visar Ymeri, Teuta Haxhiu, Rexhep Selimi dhe Albin Kurti diskutimet e të cilëve të plota janë dhënë në transkript.

Në fund, në emër të propozuesit të interpelancës, deputeti Visar Ymeri e paraqiti për miratim tekstin e Propozim-rezolutës prej 3 pikave.

Kryesuesi konstatoi se nuk ka kuorum për votimin e propozim-rezolutës. Andaj, votimi për këtë pikë shtyhet për seancën tjetër.

7. Interpelanca e kryeministrit Isa Mustafa, sipas kërkesës së deputetit Ismajl Kurteshi, i mbështetur edhe nga 7 deputetë nënshkrues, në lidhje me situatën aktuale politike në pjesën veriore të Republikës së Kosovës

Kryesuesi i njoftoi deputetët se deputeti Ismajl Kurteshi, i mbështetur nga 7 deputetë nënshkrues, ka parashtruar kërkesë për ta ftuar në interpelancë kryeministrin Isa Mustafa në lidhje me situatën aktuale politike në pjesën veriore të Republikës së Kosovës.

Kryesuesi i njoftoi deputetët për kohëzgjatjen e interpelancës prej tri orësh, si dhe për kohën e ndarë për secilin grup parlamentar dhe për deputetët pa grup parlamentar.

Kryesuesi e ftoi propozuesin e interpelancës që ta marrë fjalën.

Deputeti Ismajl Kurteshi, në emër të grupit të deputetëve nënshkrues, tha se derisa shqiptarët e dëbuar me dhunë nga paramilitarët e organizuar dhe të paguar nga shteti i Serbisë para e pas lufte nuk mund të kthehen në banesat dhe shtëpitë e tyre të uzurpuara e të shkatërruara e nuk lejohen as t'i rindërtojnë shtëpitë e tyre të shkatërruara në pjesën veriore të Kosovës, Serbia, e papenguar nga Qeveria e Kosovës, po ngre koloni për kolonët e rinj serbë.

Strukturat ilegale të Serbisë veprojnë lirshëm dhe mbajnë nën uzurpim gjithë jetën publike dhe private të banorëve me kombësi serbe, boshnjake dhe më së shumti të atyre me kombësi shqiptare të asaj zone, duke pamundësuar të drejtën e fituar nga neni 35, pika 1 e Kushtetutës së Republikës së Kosovës mbi lirinë e lëvizjes në vendin e tyre.

Strukturat e Qeverisë së Serbisë dhe institucioneve të sigurisë, në shpërfillje të plotë të institucioneve të Kosovës, po ashtu diktojnë jetën e përditshme, jetën politike e ekonomike në katër komunat veriore. Ata kanë të shtrirë jashtëligjshëm atje postën, bankën, telefoninë e deri te platformat e TV, si dhe të gjitha shërbimet e tjera shtetërore të Serbisë. Madje, edhe pse furnizohen me rrymë e me shërbime të ujit të pijshëm e kanalizimeve nga kompanitë e Republikës së Kosovës, pra të shtetit të tyre, as nuk paguajnë e as nuk janë të regjistruar me kontrata si të gjithë qytetarët e tjerë. Krejt e kundërta ndodh me shqiptarët, të cilët tashmë janë pakicë në këto komuna pas spastrimit etnik që ndodhi gjatë vitit 2000, ku mbi 11 mijë shqiptarë u përzunë nga shtëpitë e tyre dhe vetëm në netët e 3 dhe 4 shkurtit u ekzekutuan 10 shqiptarë brenda nëpër shtëpi, u plagosën me armë zjarri 25 të tjerë dhe u keqtrajtuan rëndë fizikisht 93 shqiptarë.

Për 17 vjet me radhë qindra shqiptarë nuk janë lejuar të kthehen në shtëpitë e tyre nga të njëjtat grupime ilegale dhe kriminale, të mbështetura financiarisht dhe me armatim nga qeveritë e Serbisë.

Paralelisht me strategjinë e gabuar të Qeverisë së Kosovës, është paralajmëruar nga autoritetet e Serbisë se në territorin e Republikës së Kosovës, midis Mitrovicës dhe Zveçanit, po përgatiten të ndërtojnë një lagje të pastër etnikisht, që e kanë quajtur “Lugina e Diellit”.

Kryeministri i Kosovës e ka vlerësuar si të paligjshme ngritjen e një lagjeje të tillë në territorin e Kosovës nga ana e Serbisë. Por, përkundër këtij qëndrimi, ministrat nga Lista Serbe në Qeverinë Mustafa morën pjesë në inaugurimin e fillimit të punimeve në këtë territor dhe e përshëndetën iniciativën. Diskutimi i plotë i deputetit Ismajl Kurteshi është dhënë në transkript.

Pastaj, kryesuesi e ftoi kryeministrin e Republikës së Kosovës, z. Isa Mustafa, që ta paraqesë qëndrimin e Qeverisë lidhur me këtë çështje.

Kryeministri Isa Mustafa tha se gjendja në veri të vendit nuk ka qenë e mirë për një kohë të gjatë që nga fundi i luftës. Këtë gjendje e kemi trashëguar nga UNMIK-u, i cili nuk ka arritur ta shtrijë administrimin në veri të vendit dhe të mos lejojë ndërhyrjen e Serbisë dhe të strukturave paralele. Njëra nga sfidat më të mëdha ishte vendosja e normalitetit në veri dhe integrimi i popullatës serbe që jeton atje në institucionet e Republikës së Kosovës.

Qeveria e Republikës së Kosovës në programin e saj ka vendosur si prioritet strategjik çështjen e normalizimit të gjendjes, shtrirjen dhe konsolidimin e sovranitetit të shtetit në tërë territorin, përfshirë edhe katër komunat në veri të vendit. Vlerësoj se me gjithë vështirësitë, progresi në këtë drejtim është substancial dhe është shumë i dukshëm. Qeveria e Kosovës ka arritur të vendosë sovranitetin dhe ligjshmërinë në shumë fusha relevante, duke nisur nga vendosja e kufirit me Serbinë, funksionimin e komunave legale, vendosja e autoriteteve shtetërore në dy pikëkalimet kufitare në veri, vendosja e Policisë së Kosovës në komunat e veriut, zhbërja e disa strukturave paralele dhe deri te hapja e urës së Ibrit për t'u rikonstruktuar dhe për të qenë e kalueshme në të dy anët e lumit që lidh komunikimin e pjesës jugore dhe veriore të Mitrovicës.

Ne po ashtu kemi ndërmarrë masa për të ndihmuar zhvillimin ekonomik, duke akorduar një fond për zhvillim, duke marrë për bazë rrethanat atje që demonstroi përkushtimin e Qeverisë dhe institucioneve të Republikës së Kosovës që të ndihmojnë zhvillimin ekonomik të Leposaviqit, Mitrovicës së Veriut, Zubin Potokut dhe Zveçanit.

Që nga viti 2011, kur ka nisur dialogu në Bruksel, ne kemi arritur hap pas hapi të vendosim demokracinë, sundimin e ligjit dhe rendit në veri.

Duhet theksuar se problem kyç ende mbetet moszbatimi i marrëveshjeve nga ana e Serbisë dhe sipas një arsye po prolongohet implementimi i marrëveshjeve. Ndërhyrja e Serbisë përmes strukturave paralele është ende evidente, për çfarë nevojitet një reagim shumë i qartë i bashkësisë ndërkombëtare.

Policia e Kosovës është duke funksionuar në mënyrë normale, po sigurohet rendi dhe qetësia në nivel gjithnjë më të mirë, sidomos kemi arritur të përmirësojmë gjendjen e sigurisë, si dhe të ulen veprimet kriminale dhe kontrabanda. Autoritetet shtetërore të Kosovës funksionojnë në pikën kufitare që nga viti 2012, ndërsa grumbullimi i tatimeve në kufi po zhvillohet gjithnjë e më suksesshëm, po i rrit të hyrat buxhetore të Kosovës dhe po ullet evazioni fiskal dhe informaliteti. Janë mbi 1 000 firma në veri të vendit, të cilat janë të regjistruara pranë institucioneve të Kosovës dhe që paguajnë tatim në Kosovë. Besueshmëria e qytetarëve të asaj pjese në institucionet e shtetit të Kosovës është në rritje të vazhdueshme, ndërsa bashkëpunimi ndërmjet Qeverisë qendrore dhe katër komunave veriore është i rregullt.

Sa i përket vendbanimit “Lugina e Diellit”, që është e destinuar për personat e zhvendosur nga Kosova, Ministria e Mjedisit ka marrë masa menjëherë pas informacionit dhe ka autorizuar Inspektoratin e ndërtimit dhe planifikimit që të kryejë inspektim në këtë komunë dhe të njoftohet për rastin. Diskutimi i plotë i kryeministrit është dhënë në transkript.

Kryesuesi e hapi debatin për interpelancën e kryeministrit Isa Mustafa.

Për këtë pikë të rendit të ditës diskutuan këta deputetë: Zenun Pajaziti, në emër të GP të PDK-së; Ismet Beqiri, në emër të GP të LDK-së; Glauk Konjufca, në emër të GP të LVV-së; Pal Lekaj, në emër të GP të AAK-së; Zafir Berisha, në emër të GP të “Nismës”, si dhe Albulena Haxhiu, Ali Berisha, Lirije Kajtazi, Rexhep Selimi, Bekim Haxhiu, Teuta Haxhiu, Sadri Ferati, Armend Zemaj dhe Nuredi Ibishi, diskutimet e të cilëve janë dhënë të plota në transkript.

Në fund, në emër të propozuesit të interpelancës, deputeti **Ismajl Kurteshi** e paraqiti për miratim tekstin e Propozim-rezolutës prej 4 pikave.

Kryesuesi konstatoi se nuk ka kuorum për votimin e propozim-rezolutës. Andaj, votimi për këtë pikë shtyhet për seancën tjetër.

Kryesuesi i mbylli punimet e seancës plenare në orën 18:25 minuta.

Kryetari i Kuvendit

Kadri VESELI

Procesverbalin e hartoi:

Drejtorja për Çështje Plenare dhe Procedurale